



საჯარო სამართლის იურიდიული პირი -
ბათუმის შოთა რუსთაველის სახელმწიფო უნივერსიტეტის
აკადემიური საბჭო

დადგენილება №108

ქ. ბათუმი

30 ნოემბერი,

2017 წ.

ბსუ-ს ემერიტუსის ფულადი ანაზღაურების გაცემის წესის დამტკიცების შესახებ

„უმაღლესი განათლების შესახებ“ საქართველოს კანონის მე-2 მუხლის, 21-ე მუხლის პირველი პუნქტის, ბსუ-ს წესდების მე-8 და 62-ე მუხლების, „საჯარო სამართლის იურიდიული პირის – ბათუმის შოთა რუსთაველის სახელმწიფო უნივერსიტეტის წესდების დამტკიცების შესახებ“ საქართველოს განათლებისა და მეცნიერების მინისტრის 2007 წლის 14 ნოემბრის №1106 ბრძანებაში ცვლილების შეტანის თაობაზე“ საქართველოს განათლებისა და მეცნიერების მინისტრის 2017 წლის 17 ოქტომბრის N182/ნ ბრძანების საფუძველზე, აკადემიურმა საბჭომ

დაადგინა:

1. დამტკიცდეს ბსუ-ს ემერიტუსის ფულადი ანაზღაურების გაცემის თანდართული წესი (დანართი 1).
2. დადგენილება გავრცელდეს 2017 წლის 18 ოქტომბრიდან (საქართველოს განათლებისა და მეცნიერების მინისტრის 2017 წლის 17 ოქტომბრის N182/ნ ბრძანების ძალაში შესვლის თარიღიდან) წარმოშობილ სამართლებრივ ურთიერთობებზე.
3. ბსუ-ს ემერიტუსებს ეთხოვოთ წინამდებარე დადგენილების გამოცემიდან არაუგვიანეს 5 სამუშაო დღისა, წარმოუდგინონ ბსუ-ს რექტორს წერილობითი ინფორმაცია სხვა უმაღლეს საგანმანათლებლო ან სამეცნიერო-კვლევით დაწესებულებაში აკადემიური ან ადმინისტრაციული თანამდებობის დაკავების შესახებ (ასეთი ფაქტის არსებობის შემთხვევაში).
4. დადგენილების მე-3 პუნქტის შესრულებაზე კონტროლი დაევალოს შესაბამისი ფაკულტეტის დეკანს.
5. დადგენილება დაეგზავნოს ბსუ-ს მართვის ორგანოებს, ემერიტუსებს, ფაკულტეტებს, დამოუკიდებელ სამეცნიერო-კვლევით ერთეულებს, ადამიანური რესურსების მართვის სამსახურს და საფინანსო-ეკონომიკურ დეპარტამენტს.
6. დადგენილება გამოქვეყნდეს ბსუ-ს ვებგვერდზე.

აკადემიური საბჭოს თავმჯდომარე,
რექტორი, ასოც. პროფესორი

მერაბ ხალვაში

ბსუ-ს აკადემიური საბჭოს 2017 წლის 30 ნოემბრის

ბსუ-ს ემერიტუსის ფულადი ანაზღაურების გაცემის წესი

1. ემერიტუსის ფულადი ანაზღაურების გაცემის წინამდებარე წესი განსაზღვრავს საჯარო სამართლის იურიდიული პირი - ბათუმის შოთა რუსთაველის სახელმწიფო უნივერსიტეტის (შემდეგში „ბსუ“) ემერიტუსის აკადემიური წოდების მქონე პირისათვის ბსუ-ს ბიუჯეტიდან გასაცემი ფულადი ანაზღაურების ოდენობას, მისი გაცემის პირობებს და ასევე ფულადი ანაზღაურების გაცემის შეწყვეტის საფუძვლებს.

2. ბსუ-ს ემერიტუსის აკადემიური წოდების მინიჭების შესახებ ბსუ-ს აკადემიური საბჭოს დადგენილება მიიღება მხოლოდ შესაბამისი ფაკულტეტის საბჭოს წარდგინებით.

3. ბსუ-ს ემერიტუსის აკადემიური წოდება შეიძლება მიენიჭოს 65 წელს მიღწეულ პირს, რომელიც წარდგინების აღძვრის მომენტისათვის აკმაყოფილებს შემდეგ მოთხოვნებს:

ა) უკავია პროფესორის თანამდებობა და აქვს ამ თანამდებობაზე მუშაობის არანაკლებ 10 წლის გამოცდილება;

ბ) აქვს უნივერსიტეტში, მათ შორის ამ უნივერსიტეტთან ინტეგრირებულ სამეცნიერო ან/და საგანმანათლებლო დაწესებულებაში სამეცნიერო-პედაგოგიურ თანამდებობაზე მუშაობის არანაკლებ 25 წლის გამოცდილება;

გ) თავისი საგანმანათლებლო და სამეცნიერო საქმიანობით მნიშვნელოვანი წვლილი შეიტანა უნივერსიტეტში შესაბამისი დარგის განვითარებაში.

4. ემერიტუსის წოდება პირს ენიჭება შრომითი ხელშეკრულების ვადის გასვლისთანავე. უვადოდ არჩეულ პროფესორს ემერიტუსის წოდება შეიძლება მიენიჭოს მისი განცხადების საფუძველზე, შესაბამისი სასწავლო წლის დაწყებამდე არაუგვიანეს 2 თვისა.

5. ბსუ-ს აკადემიური საბჭოს დადგენილებით ბსუ-ს ემერიტუსს განესაზღვრება ყოველთვიური ფულადი ანაზღაურება, ემერიტუსის წოდების მინიჭების დროს პროფესორის საშტატო ერთეულისათვის განსაზღვრული შრომის ანაზღაურების 50 %-ის ოდენობით.

6. ბსუ-ს ემერიტუსის ყოველთვიური ფულადი ანაზღაურების გაცემა დაიწყება ემერიტუსის აკადემიური წოდების მინიჭების შესახებ აკადემიური საბჭოს დადგენილების მიღების შემდეგ, მომდევნო კალენდარული წლიდან (მომდევნო წლის ბიუჯეტიდან).

7. **ბსუ-ს ემერიტუსის აკადემიური წოდების მქონე პირი ვალდებულია:**

ა) სისტემატური მონაწილეობა მიიღოს ბსუ-ს საზოგადოებრივ საქმიანობაში და შესაბამისი დარგობრივი დეპარტამენტის, განყოფილების, ლაბორატორიის აკადემიურ და სამეცნიერო აქტივობაში, რაც შეიძლება გამოიხატოს ანაზღაურების გარეშე სამაგისტრო და სადოქტორო ნაშრომების ხელმძღვანელობაში, სამეცნიერო საგრანტო პროექტების მომზადებაში ან/და ბსუ-ს სტუდენტებისათვის კონსულტაციების ჩატარებაში (ამ პირობის ჯანმრთელობის მდგომარეობის გამო შესაბამის სემესტრში შეუსრულებლობის შემთხვევაში, ემერიტუსმა ფაკულტეტის საბჭოს უნდა წარუდგინოს კანონმდებლობით დადგენილი წესით გაცემული ჯანმრთელობის ცნობა, რომელიც დაერთვება ემერიტუსის ყოველწლიურ ანგარიშს);

ბ) სხვა უმაღლეს საგანმანათლებლო ან სამეცნიერო-კვლევით დაწესებულებაში აკადემიური ან ადმინისტრაციული თანამდებობის დაკავების ან ბსუ-ში შრომითი საქმიანობის დაწყების შემთხვევაში (გარდა საათობრივად ანაზღაურებადი პედაგოგიური საქმიანობისა), **არაუგვიანეს 3 სამუშაო დღისა** აცნობოს ბსუ-ს რექტორს;

გ) ყოველი სასწავლო წლის ბოლოს, **არაუგვიანეს 30 ივნისისა**, შესაბამის ფაკულტეტის საბჭოს წარუდგინოს ანგარიში მის მიერ ამ წესის მოთხოვნების შესრულების შესახებ;

დ) საქმიანობის განხორციელების პროცესში იხელმძღვანელოს ბსუ-ს ინტერესებითა და ეთიკის კოდექსით;

8. ემერიტუსის ანგარიშის ფაკულტეტის საბჭოს სხდომაზე განხილვის შედეგები ფაკულტეტის დეკანის მიერ არაუგვიანეს **შესაბამისი წლის 15 ივლისისა უნდა** წარუდგინოს ბსუ-ს აკადემიურ საბჭოს.

9. ბსუ-ს ემერიტუსისათვის ფულადი ანაზღაურების გაცემის შეწყვეტის შესახებ აკადემიური საბჭოს დადგენილება უნდა გამოიცეს:

ა) ბსუ-ს ემერიტუსის მიერ სხვა უმაღლეს **საგანმანათლებლო ან სამეცნიერო-კვლევით დაწესებულებაში** აკადემიური ან ადმინისტრაციული თანამდებობის დაკავების შემთხვევაში;

ბ) ბსუ-ს ემერიტუსის მიერ ბსუ-ში შრომითი საქმიანობის (გარდა საათობრივად ანაზღაურებადი პედაგოგიური საქმიანობის) დაწყების შემთხვევაში;

გ) ამ წესით გათვალისწინებული ინფორმაციის ან/და ანგარიშის წარმოდგენლობის შემთხვევაში.

10. ბსუ-ს წესდებითა და ამ წესით გათვალისწინებული საფუძვლის არსებობის შემთხვევაში ბსუ-ს ემერიტუსისათვის ფულადი ანაზღაურების გაცემის შეწყვეტა უნდა მოხდეს **შეწყვეტის საფუძვლის წარმოშობიდან მომდევნო თვის პირველი რიცხვიდან**, მიუხედავად იმისა, თუ როდის იქნება წარმოდგენილი შესაბამისი ინფორმაცია (განცხადება, დოკუმენტი, სამსახურებრივი ბარათი და სხვა) ან/და როდის განიხილავს აღნიშნულ საკითხს აკადემიური საბჭო (ასეთ შემთხვევაში ზედმეტად გაცემული ფულადი ანაზღაურება უნდა დაექვემდებაროს უკან დაბრუნებას ადმინისტრაციის ხელმძღვანელის ბრძანების საფუძველზე).

11. ბსუ-ს ემერიტუსისათვის ფულადი ანაზღაურების გაცემის შეწყვეტის შესახებ აკადემიური საბჭოს დადგენილება აღსასრულებლად გადაეცემა ბსუ-ს ადმინისტრაციის ხელმძღვანელს.

12. იმ პირებზე, რომლებსაც ამ წესის ამოქმედებამდე მიენიჭათ ბსუ-ს ემერიტუსის აკადემიური წოდება, გაიცეს ყოველთვიური ფულადი ანაზღაურება 1250 ლარის ოდენობით.

13. იმ პირებისათვის, რომლებსაც ამ წესის ამოქმედებამდე მიენიჭათ ბსუ-ს ემერიტუსის აკადემიური წოდება და არჩეულნი არიან ბსუ-ს სამეცნიერო თანამდებობებზე, ბსუ-ს წესდების 62-ე მუხლის მე-5 პუნქტით გათვალისწინებული ვალდებულება შრომითი ურთიერთობის შეზღუდვასთან დაკავშირებით (გარდა საათობრივი ანაზღაურების წესით შესრულებადი პედაგოგიური საქმიანობისა) ამოქმედდეს შრომითი ხელშეკრულების ვადის ამოწურვისთანავე.